



Broj: 01-50-1-15-26/08
Sarajevo, 10. 4. 2008. godine

ZAPISNIK

26. sjednice Predstavničkog doma
Parlamentarne skupštine Bosne i Hercegovine,
održane 2., 3. i 10. aprila 2008. godine

Sjednica je počela u 2. aprila 2008. godine u 11,05 sati. Prisustvovali su svi poslanici.

Iz Vijeća ministara BiH sjednici su prisustvovali: predsjedavajući Nikola Špirić, ministri Tarik Sadović, Dragan Vrankić, Sredoje Nović, Božo Ljubić, Bariša Čolak i Slobodan Puhalac, te zamjenici ministara Fuad Kasumović, Senad Šepić, Marina Pendeš, Mijo Krešić i Srđan Arnaut.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, EUPM-a, Evropske komisije, američke i britanske ambasade, kao i nevladinih organizacija Centara civilnih inicijativa i NDI.

Sjednici su prisustvovali predstavnici Visokog sudskog i tužilačkog vijeća BiH, Tužilaštva BiH, Pravobranilaštva BiH i Centralne izborne komisije BiH.

Predsjedavajući Doma Milorad Živković obrazložio je izmjene i dopune prijedloga dnevnog reda koji su poslanici dobili u pozivu za sjednicu.

U raspravi o prijedlogu dnevnog reda učestvovali su: Mirko Okolić, Denis Bećirović i Slavko Jovičić.

Mirko Okolić predložio je da se, zbog obimnosti dnevnog reda, skinu poslanička pitanja i odgovori, čemu se usprotivio Slavko Jovičić pa je Okolić prijedlog povukao.

Denis Bećirović predložio je da se u dnevni red ove ili naredne sjednice uvrsti informacija Vijeća Evrope naslovljena kao Izvršavanje obaveza i provođenje postprijemnog programa saradnje.

U vezi s ovim prijedlogom Bećirovića, predsjedavajući Živković rekao je da je u Kolegiju već dogovoreno da se pomenuti materijal uvrsti u dnevni red naredne sjednice Doma.

Nakon rasprave, predsjedavajući je konstatirao da 26. sjednica Doma ima sljedeći

DNEVNI RED

1. Usvajanje zapisnika 23., 24. i 25. sjednice Predstavničkog doma;
2. Poslanička pitanja i odgovori;
3. Zahtjev poslanika Azre Hadžiahmetović za razmatranje Prijedloga zakona o nezavisnim i nadzornim tijelima policijske strukture BiH po hitnom postupku, u skladu s članom 127. Poslovnika;
4. Zahtjev poslanika Azre Hadžiahmetović za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH po hitnom postupku, u skladu s članom 127. Poslovnika;
5. Zahtjev poslanika Drage Kalabića za razmatranje Prijedloga zakona o nezavisnim i nadzornim tijelima policijske strukture BiH po hitnom postupku, u skladu s članom 127. Poslovnika;
6. Zahtjev poslanika Drage Kalabića za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH po hitnom postupku, u skladu s članom 127. Poslovnika;
7. Zahtjev poslanika Nike Lozančića za razmatranje Prijedloga zakona o nezavisnim i nadzornim tijelima policijske strukture BiH po hitnom postupku, u skladu s članom 127. Poslovnika;
8. Zahtjev poslanika Nike Lozančića za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH po hitnom postupku, u skladu s članom 127. Poslovnika;

9. Prijedlog zakona o izmjenama i dopunama Izbornog zakona BiH, predlagači: poslanici Milorad Živković, Niko Lozančić i Šefik Džaferović (drugo čitanje);
10. Prijedlog zakona o kretanju i boravku stranaca i azilu (drugo čitanje);
11. Prijedlog zakona o izmjenama i dopunama Zakona o Službi za poslove sa strancima (drugo čitanje);
12. Prijedlog kodeksa ponašanja poslanika i delegata u Parlamentarnoj skupštini BiH (drugo čitanje);
13. Prijedlog zakona o izmjenama i dopunama Zakona o sukobu interesa u institucijama vlasti BiH – predlagači: poslanici Milorad Živković, Niko Lozančić i Šefik Džaferović (prvo čitanje);
14. Prijedlog zakona o lijekovima i medicinskim sredstvima (prvo čitanje);
15. Prijedlog zakona o plaćama i naknadama u institucijama Bosne i Hercegovine (prvo čitanje);
16. Prijedlog zakona o izmjenama i dopunama Zakona o jedinstvenom matičnom broju (prvo čitanje);
17. Prijedlog zakona o izmjenama i dopunama Zakona o ličnoj karti državljana Bosne i Hercegovine (prvo čitanje);
18. Prijedlog zakona o izmjenama i dopunama Zakona o prebivalištu i boravištu državljana Bosne i Hercegovine (prvo čitanje);
19. Prijedlog zakona o Fiskalnom vijeću BiH (prvo čitanje),
20. Prijedlog zakona o Agenciji za kontrolu i osiguranje prisilnog oduzimanja imovine stečene krivičnim djelima i upravljanje oduzetom imovinom, predlagači: poslanici Kluba SDPBiH (prvo čitanje);
21. Prijedlog okvirnog zakona o srednjem stručnom obrazovanju i obuci (prvo čitanje);
22. Izvještaj Zajedničke komisije o nastojanju za postizanje sporazuma o Prijedlogu zakona o izmjenama i dopunama Zakona o putnim ispravama BiH;
23. Informacija o stanju sigurnosti u BiH za 2007. godinu, s Informacijom o trenutnom stanju sigurnosti u BiH (po zaključku Doma sa 21. sjednice) – dopunjena tačka;
24. Informacija o radu Tužilaštva BiH za 2007. godinu;
25. Izvještaj o radu Pravobranilaštva BiH za period od 1.1.2007. do 31.12.2007.;
26. Razmatranje Programa mjera za primjenu Sporazuma CEFTA;
27. Davanje saglasnosti za ratifikaciju:
 - a) "eSEE" Agenda plus za razvoj informacionog društva u Jugoistočnoj Evropi – SEE 2007. – 2011.
 - b) Sporazuma između država članica Sjevernoatlantskog ugovora i ostalih država koje učestvuju u Partnerstvu za mir o pravnom položaju njihovih snaga, Dodatnog protokola Sporazumu između država članica Sjevernoatlantskog ugovora i ostalih država koje učestvuju u Partnerstvu za mir o pravnom položaju njihovih snaga i Daljnog dodatnog protokola Sporazumu između država članica Sjevernoatlantskog ugovora i ostalih država koje učestvuju u Partnerstvu za mir o pravnom položaju njihovih snaga.

Ad .1. Usvajanje zapisnika 23., 24. i 25. sjednice Predstavničkog doma

Na zapisnike nije bilo primjedbi pa su usvojeni jednoglasno.

Ad. 2. Poslanička pitanja i odgovori

Predsjedavajući Doma konstatirao je da su odgovore za ovu sjednicu dobili:

- Snježana Rajilić – od Vijeća ministara BiH, na pitanje postavljeno na 15. sjednici;
- Sefer Halilović – od Vijeća ministara BiH, na pitanje postavljeno na 18. sjednici;
- Adem Huskić – od Vijeća ministara BiH, na pitanje postavljeno na 20. sjednici;
- Selim Bešliagić – od Tužilaštva BiH, na pitanje postavljeno na 20. sjednici, i od Vijeća ministara BiH, na pitanje postavljeno na 21. sjednici.

Nije bilo komentara na odgovore.

Nova pitanja postavili su poslanici kako slijedi:

Sadik Bahtić – Vijeću ministara BiH - Ministarstvu pravde BiH:

„Molim vas da mi odgovorite na osnovu kojeg je zakona SDP kao nasljednik Komunističke partije uzurpirao i prisvojio državnu imovinu? Radi se o velikoj imovini bivšeg Saveza komunista koji je SDP prisvojio tokom agresije na BiH i sada ubire ogromna sredstva od zakupa...“

Selim Bešlić – Vijeću ministara BiH:

„Kada će biti ratificirana Evropska konvencija o međugraničnoj saradnji između teritorijalnih zajednica i vlada, a koja je parafirana 30.4.2004.?“

Husein Nanić – Ministarstvu za ljudska prava i izbjeglice BiH:

„U Zakonu o Budžetu institucija BiH i međunarodnih obaveza BiH za 2008. godinu usvojen je i grant za program povratka izbjeglica i raseljenih lica u iznosu od 32.500.000 KM. Postavljam pitanje Ministarstvu za ljudska prava i izbjeglice BiH – Da li je i u kojoj fazi izrada programa, te da li će se na vrijeme osigurati realizacija i utrošak sredstava, s obzirom da je već nastupio drugi kvartal u ovoj godini, da je počela građevinska sezona i s obzirom na činjenicu da u prošloj godini, zbog nespremnosti Ministarstva i fonda, sredstva toliko potrebna za povratak, nisu utrošena?“

Salko Sokolović – Regulatornoj agenciji za komunikacije – Vijeću RAK-a - direktoru:

„Dana 27. marta 2008. dobio sam pismo od grupe zaposlenih u „Elektroprivredi HZHB“ u kojem se navode neke činjenice u vezi s članstvom gospodina Branislava Božića u Vijeću Regulatorne agencije za komunikacije. Stoga postavljam pitanja Vijeću Regulatorne agencije za komunikacije i direktoru:

1. Da li je gospodin Božić u sukobu interesa u pogledu predstavljanja i kao član Vijeća a i korisnik usluga Regulatorne agencije za komunikacije kao jedan od rukovodećih ljudi u „Elektroprivredi HZHB“?
2. Kolika je naknada za članove Vijeća, te koju vrstu troškova RAK priznaje članovima Vijeća i do kojeg iznosa, te kolika su bila ukupna mjesečna primanja u RAK-u u posljednjih 12 mjeseci, u Vijeću RAK-a u posljednjih 12 mjeseci?
3. Da li je RAK davalac frekvencije „Elektroprivredi HZHB“ i koliko puta?“

Azra Alajbegović – Vijeću ministara BiH i Upravi za inidirektno oporezivanje BiH:

„Imam kratko pitanje za Vijeće ministara BiH i Direkciju za indirektno oporezivanje BiH, a to je - da se razmotri mogućnost uvođenja diferencirane stope PDV-a za osnovne životne namirnice: lijekove, školski pribor i dječiju hranu.“

Rifat Dolić – inicijativa ministru vanjskih poslova BiH Svenu Alkalaju:

„Poslanička inicijativa je ministru vanjskih poslova Svenu Alkalaju za upućivanje protestne note vladama Republike Srbije i Republike Hrvatske radi nezakonitog otuđivanja imovine „Agrokomerca“ d.d.Velika Kladuša, dioničara i države BiH i kršenja Ugovora o sukcesiji potpisanog 29.6.2001.“

„Postavljam **pitanje ministru za ljudska prava i izbjeglice BiH:** „Kakvu besplatnu pravnu zaštitu i pravne usluge mogu koristiti građani BiH u oba entiteta po sadašnjim propisima, kojim propisima je to regulirano i ako nije, namjerava li se nešto preduzeti u besplatnom pružanju pravnih usluga za siromašne građane koji gube i ne ostvaruju prava samo zato što nisu u mogućnosti plaćati skupe pravne usluge advokata i notara u BiH?“

Snježana Rajilić – Vijeću ministara BiH:

„Ko je (koja je institucija) provodio proceduru za aviosnimanje Federacije BiH, a koja je izazvala uznemiravanje građana RS-a? Koja firma je dobila ove radove? Kada je raspisan tender za ovaj posao? Ko su bili članovi komisije za izbor najboljeg ponuđača? Ko finansira ovaj posao i koliko je koštao? Ko je pribavio saglasnost nadležnih institucija RS-a za ovaj posao i da li je izvođač radova imao u trenutku obavljanja snimanja? Zašto lokalne zajednice nisu obaviještene o ovom poslu? Zašto nije

tražena a ni formalno upoznata Uprava za geodetske i imovinsko-pravne poslove Republike Srpske o predstojećem snimanju? Koji je bio obuhvat radova, odnosno koja teritorija i koja površina?“

Šemsudin Mehmedović – Vijeću ministara BiH:

„1. Na 20. sjednici postavio sam poslaničko pitanje u vezi s radom Državne komisije za granice. U odgovoru sam informiran da je Komisija u periodu 2000. - 2007. godina potrošila 1.741.000 KM a da nije uradila posao. Koliko sam informiran, istoj komisiji istekao je mandat 7.7.2007., a nije imenovana nova niti je ovoj produžen mandat. Pitam Vijeće ministara BiH – kada će biti imenovana nova državna komisija za granice?“

2. S obzirom na posljednji stav Evropske komisije u vezi s poštivanjem nezavisnosti Regulatorne agencije za komunikacije te poštivanjem Zakona o komunikacijama BiH, pitam Vijeće ministara BiH – kada će potvrditi imenovanje direktora Regulatorne agencije što mu je obaveza po Zakonu o komunikacijama?“

Adem Huskić – Vijeću ministara BiH i Predsjedništvu BiH:

„Šta su Vijeće ministara BiH i Predsjedništvo BiH preduzeli na rješavanju spornih pitanja vezanih za vlasništvo i zaštitu interesa BiH, a u vezi s jadranskim naftovodom?“

„Molim Sekretarijat Doma da mi dostavi podatke o tome koliko puta nisam prisustvovao sjednicama Doma Parlamentarne skupštine BiH, te da li su razlozi bili opravdani ili ne? Pitanje se odnosi na period od preuzimanja mandata do danas?“

Mirko Okolić – inicijativa Stručnoj službi Doma:

„Predlažem da Stručna služba ubuduće napravi kalendar, naravno prema svom nahodanju i kako je njima najlakše, zakazivanja i održavanja sjednica parlamentarnih komisija s mjestom njihovog održavanja.“

Šefik Džaferović – Vijeću ministara BiH:

„Kratko ću postaviti jedno životno pitanje tragom zaključaka sa sjednice Općinskog vijeća Zenica, održane 6. marta 2008., kada je to vijeće razmatralo informaciju o epidemiološkoj situaciji na području zeničke općine. Ovim zaključcima, koje sam dobio kao poslanik u Predstavničkom domu Parlamentarne skupštine BiH, zatraženo je od mene da se obratim ovom domu. Pretpostavljam da postoje određeni problemi u funkcioniranju Ureda za veterinarstvo BiH. Mi imamo Ured za veterinarstvo i ja bih želio da dobijem informaciju od tog ureda – Da li je taj ured u potpunosti konstituisan, te da li postoje problemi u njegovom radu? Ako postoje, onda šta je to što treba da uradimo u BiH kako bi on u potpunosti funkcionirao?“

I posebno pitanje - da li je osiguran jedinstven način provođenja kontrole zaštite životinja na cijeloj teritoriji države?“

Jovan Todorović:

Ponovio je pitanje koje je Vijeću ministara BiH postavio na 9. sjednici, 23. maja 2007., a koje se odnosi na granični prijelaz u Gradišci. Pitanje postavljeno na 9. sjednici glasi: „Pitanje sam postavio još u petom mjesecu prošle godine. Ponavljam ga, a odnosi se na podršku rješavanju posljedica funkcioniranja graničnog prijelaza u Gradišci. Granični prijelaz u Gradišci nalazi se u centru grada i uzrokuje ozbiljne teškoće u organizaciji i funkcioniranju života u i oko grada. Zbog velike frekvencije saobraćaja, infrastruktura u Gradišci permanentno se urušava. Prijedlog je da se za tekuće investiciono održavanje saobraćajnica i infrastrukture koji su u funkciji graničnog prijelaza i terminala osiguraju redovni prihodi u budžetu općine iz prihoda za usluge korištenja terminala i to tako da se najmanje 50% ovih prihoda uplaćuje direktno u budžet Općine Gradiška. Na ovakav prijedlog obavezuje nas Evropska povelja o zaštiti prava lokalne samouprave kao i jakih trendova centralizacije vlasti pogotovo u oblasti fiskalne politike što omogućava i uskraćuje finansijska sredstva lokalnoj samoupravi. Tražio sam to u pismenoj formi, to i ovog puta tražim.“

Denis Bećirović - predsjedavajućem Vijeća ministara BiH, ministru za ljudska prava i izbjeglice BiH i ministru civilnih poslova BiH:

„BiH je jedina država u Evropi u kojoj imate primjere da djeluju dvije škole pod jednim krovom. I što je najgore, situacija u tom pogledu se pogoršava. Segregacija po etničkom kriteriju u školama u BiH postala je izgleda norma, a ne više izuzetak i to na teritoriji cijele BiH. Stoga u najkraćem postavljam pitanje i predsjedavajućem Vijeća ministara BiH i ministru za ljudska prava i izbjeglice BiH i ministru civilnih poslova BiH, svakome iz njegovog domena i u okviru njegovih nadležnosti - šta su oni konkretno učinili da spriječe segregaciju učenika u BiH?

I za razliku od ovih pitanja gdje tražimo pisane odgovore, a na koje, u pravilu, gotovo ne dobivamo nikakve, suprotno Poslovniku, tražim da mi se usmeno danas na sjednici odgovori na to pitanje, s obzirom da to potresa BiH evo već danima.“¹

Sead Jamakosmanović – Vijeću ministara BiH:

„Zašto do sada nije potpisana Konvencija UN-a o pravima lica s invaliditetom i kada će biti upućena na ratifikaciju u ovaj dom?“

Bajazit Jašarević – predsjedavajućem Vijeća ministara BiH, ministru finansija i trezora BiH i ministru vanjske trgovine i ekonomskih odnosa BiH:

„Kada će se u parlamentarnoj proceduri naći Zakon o izmjenama i dopunama Zakona o akcizama BiH i Zakon o izmjenama i dopunama Zakona o carinskoj tarifi BiH?“

Velimir Jukić – Vijeću ministara BiH:

„Šta preduzima Vijeće ministara BiH po pitanju povrata stare devizne štednje građanima BiH koja se nalazila, i danas se nalazi, u bankama čije je sjedište izvan BiH – Ljubljanska banka, Investiciona banka Beograd i druge banke ako ih ima?“

Vinko Zorić - Vijeću ministara BiH:

„Prvo pitanje je kad će prestati asimilacija cijelog naroda, jer nije asimilacija samo ono što se događa u jednoj školi, postoji u okruženju a i u drugim zemljama na svijetu škola jedna, dvije, a ja sam radio u školi u susjednoj Republici Hrvatskoj gdje su četiri škole pod jednim krovom i mislim da je veći problem ove zemlje asimilacija jednog konstitutivnog naroda, nego jedna škola u u jednoj mjesnoj zajednici ili u jednom mjestu.“

Drugo pitanje Predsjedništvu BiH i Ministarstvu vanjskih poslova BiH:

„Tražim cjelovitu informaciju od Predsjedništva BiH o Sporazumu o dvojnomo državljanstvu s Republikom Hrvatskom. Šta je razlog blokiranja tog sporazuma? A nakon što je, kao što je i javnost upoznata, provedena sva potrebna procedura? Istu informaciju tražim i od Ministarstva vanjskih poslova BiH.“

Milorad Živković – Vijeću ministara BiH - Ministarstvu sigurnosti BiH i Ministarstvu vanjskih poslova BiH:

„U sinoćnjoj emisiji BHT-a čuo sam da su, u vezi s posjetom predsjednika Sjedinjenih Američkih Država, gospodina Buša, on i službe koje su zadužene za njegov siguran boravak u Hrvatskoj izrazili zabrinutost zbog mogućnosti postojanja tzv. spavača u BiH – bijele Al kaide i terorista.

Pitanje upućeno Vijeću ministara BiH da se, evo danas imamo tu tačku dnevnog reda, ako se ne može odgovoriti, pripremi do te tačke dnevnog reda, da li je ta informacija tačna? Ako nije tačna, potpitanje Ministarstvu vanjskih poslova BiH – da li je upućen demant? Ako je tačna, koliko tih ljudi ima i šta se čini da oni odu iz BiH?“

Sadik Ahmetović – Vijeću ministara BiH:

„U posljednjem broju jednog sedmičnog lista pročitao sam intervju s vođom četničkog ravnogorskog pokreta koji kaže da u strukturama policije i vojske ima na stotine svojih pripadnika.

¹ Kako poslanik odgovor nije dobio na sjednici, pitanje je proslijeđeno na naznačene adrese, sa naznakom da se za narednu sjednicu pripreme za davanje usmenog odgovora.

Volio bih da mi do sljedeće sjednice Parlamentarne skupštine BiH Vijeće ministara BiH dostavi informaciju o tačnosti ovih podataka.“

Jerko Ivanković Lijanović – inicijativa Vijeću ministara BiH:

„Upućujem inicijativu Vijeću ministara BiH da ubrza potpis i verifikaciju Konvencije o pravima lica s invaliditetom koju je Generalna skupština UN-a usvojila 13. decembra 2006. Do sada je Konvenciju potpisalo ukupno 125 zemalja, dok je 18 zemalja i ratificiralo ovaj dokument. Sve zemlje iz okruženja su ovu konvenciju potpisale a Hrvatska je i ratificirala u svom parlamentu.“

Ad . 3. Zahtjev poslanika Azre Hadžiahmetović za razmatranje Prijedloga zakona o nezavisnim i nadzornim tijelima policijske strukture BiH po hitnom postupku, u skladu s članom 127. Poslovnika i

Ad. 4. Zahtjev poslanika Azre Hadžiahmetović za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH po hitnom postupku, u skladu sa članom 127. Poslovnika

Predsjedavajući Živković iznio je prijedlog da se vodi jedinstvena rasprava o zahtjevu za proceduru po dva zakona za koje je jedan predlagač, a kad se završi rasprava o svim tačkama, izvršilo bi se glasanje o zahtjevima za proceduru, a onda o prijedlozima zakona.

Vinko Zorić iznio je mišljenje da bi se isključili naredni prijedlozi ako bi se usvojio jedan od ovih zakona, pa je zato predložio ili da se istovremeno raspravlja o svima, ili da se glasa odmah nakon završetka rasprave pojedinačno o svakom od ovih šest zahtjeva i zakona.

Predsjedavajući Živković pojasnio je da je dogovor Kolegija da se predlagačima da mogućnost da se obrate Domu u vezi sa svojim prijedlozima. Nakon toga će se obaviti rasprava i preći na zahtjeve i prijedloge drugih predlagača. Kada dođe glasanje, ako bi se usvojio jedan zakon, isključio bi naredne, rekao je, pored ostalog, predsjedavajući Živković.

Azra Hadžihmetović ukratko je obrazložila zahtjeve iz 3. i 4. tačke dnevnog reda.

U raspravi i replikama u okviru ove dvije tačke učestvovali su: Zlatko Lagumdžija, Azra Hadžiahmetović, Beriz Belkić, Martin Raguž, Momčilo Novaković, Milorad Živković, Jozo Križanović, Nikola Špirić, Jerko Ivanković Lijanović, Branko Dokić, Remzija Kadrić, Bakir Izetbegović, Denis Bećirović, Sadik Bahtić, Slavko Matić i Adem Huskić.

Prilikom glasanja (nakon rasprave o svim tačkama dnevnog reda), predsjedavajući Živković prvo je na glasanje dao prijedlog zaključka koji je predložio Jerko Ivanković Lijanović, a koji glasi:

„Ukoliko se na 26. sjednici Predstavničkog doma ne usvoji Prijedlog zakona o nezavisnim i nadzornim tijelima policijske strukture BiH i Prijedlog zakona o Direkciji za koordinaciju policijskih tijela i o agencijama za podršku policijskoj strukturi BiH, donosi se odluka o održavanju prijevremenih općih izbora 5.10.2008., zajedno s održavanjem općinskih izbora u BiH“.

Ovaj zaključak nije usvojen. "Za" je glasalo devet, "protiv" 27, "suzdržana" su bila tri poslanika.

Zatim se Dom izjasnio o zahtjevima za hitni postupak iz 3. i 4. tačke dnevnog reda.

Zahtjevi su usvojeni sa 21 glasom "za" (Federacija BiH 12, RS devet), "protiv" 19, "suzdržana" su bila dva poslanika.

Zahtjev za proceduru iz 4. tačke usvojen je sa 20 glasova "za" (Federacija BiH 12, RS osam), 18 "protiv" i tri "suzdržana".

Kada je predsjedavajući otvorio raspravu o prijedlozima zakona, Azra Hadžiahmetović obavijestila je Dom da su tri predlagača ovih zakona koji su na dnevnom redu 26. sjednice postigli dogovor o jedinstvenom tekstu i da ona zato, kao ovlašteni predlagač, povlači prijedloge zakona iz 3. i 4. tačke.

Ad. 5. Zahtjev poslanika Drage Kalabića za razmatranje Prijedloga zakona o nezavisnim i nadzornim tijelima policijske strukture BiH po hitnom postupku, u skladu s članom 127. Poslovnika i

Ad. 6. Zahtjev poslanika Drage Kalabića za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH po hitnom postupku, u skladu s članom 127. Poslovnika

Drago Kalabić obraložio je svoje razloge podnošenja zahtjeva za hitni postupak za prijedloge zakona iz 5. i 6. tačke.

U okviru ovih tačaka u raspravi i replikama učestvovali su: Rifat Dolić, Lazar Prodanović, Husein Nanić, Zlatko Lagumdžija, Sadik Bahtić, Drago Kalabić, Sefer Halilović, Remzija Kadrić Denis Bećirović, Jozo Križanović, Selim Bešlagić, Vinko Zorić, Slavko Jovičić, Nikola Špirić, Martin Raguž, Vinko Zorić i Branko Dokić.

Prilikom glasanja i zahtjevi za proceduru iz 5. i 6. tačke usvojeni su sa 21 glasom "za" (Federacija BiH 12, RS devet), 19 "protiv" i dva "suzdržana".

Nakon glasanja, Drago Kalabić povukao je prijedloge zakona.

Ad. 7. Zahtjev poslanika Nike Lozančića za razmatranje Prijedloga zakona o nezavisnim i nadzornim tijelima policijske strukture BiH po hitnom postupku, u skladu s članom 127. Poslovnika i

Ad. 8. Zahtjev poslanika Nike Lozančića za razmatranje Prijedloga zakona o Direkciji za koordinaciju policijskih tijela i o agencijama za podršku policijskoj strukturi BiH po hitnom postupku, u skladu s članom 127. Poslovnika

Niko Lozančić je, u svojstvu predlagača, također obrazložio zahtjeve za hitni postupak za prijedloge zakona iz ovih tačaka.

U raspravi i replikama učestvovali su: Denis Bećirović, Momčilo Novaković, Niko Lozančić, Zlatko Lagumdžija i Jerko Ivanković Lijanović.

Nakon što su i zahtjevi za proceduru iz 7. i 8. tačke usvojeni (istim rezultatom glasanja: "za" 21 (Federacija BiH 12, RS devet), "protiv" 19, "suzdržana" dva), Niko Lozančić povukao je prijedloge zakona.

Ad. 9. Prijedlog zakona o izmjenama i dopunama Izbornog zakona BiH, predlagači: poslanici Milorad Živković, Niko Lozančić i Šefik Džaferović (drugo čitanje)

U uvodnim napomenama predsjedavajući Živković podsjetio je poslanike na zaključak s prošle sjednice Doma, kojim je, zbog većeg broja amandmana, odgođeno izjašnjavaње o Prijedlogu zakona u drugom čitanju, a radna grupa zadužena da izvrši konsultacije i napravi kompromisni prijedlog. Rekao je da su izvršene određene konsultacije predlagača zakona, podnosilaca amandmana i članova Centralne izborne komisije BiH te da još Centralna izborna komisija BiH nije pripremila dokument. Zamolio je da se sad o ovome ne raspravlja, a kad Centralna izborna komisija BiH dostavi prijedlog, onda se može rasprava otvoriti.

Nije bilo rasprave.

Prilikom glasanja, predsjedavajući je obavijestio Dom da nije postignut kompromis, te da će se zato glasati o amandmanima podnesenim u plenarnoj fazi. Istovremeno je obavijestio da on povlači svoje amandmane. Zatim je proveo glasanje o preostalim amandmanima. Usvojen je samo amandman Jerka Ivankovića Lijanovića. Rezultati glasanja su sljedeći:

- Amandman Novakovića na Amandman 7. Komisije: "za" 12, "protiv" 21, "suzdržalo" se šest poslanika. Tokom glasanja Novaković je povukao amandmane koje je želio braniti u plenarnoj fazi.
- Amandman Šefika Džaferovića: "za" 19 (Federacija BiH 17, RS dva), "protiv" 11, "suzdržalo" se devet. U drugom krugu glasanja, iz RS-a "protiv" je glasalo 11 poslanika, što je više od 2/3 iz entiteta.

- Amandman Beriza Belkića: "za" 22 (Federacija BiH 20, RS dva), "protiv" 12, "suzdržalo" se sedam. U drugom krugu glasanja, iz RS-a "protiv" je glasalo 11 poslanika.
- Amandman Sadika Ahmetovića i Remzije Kadrića: "za" 22 (Federacija BiH 20, RS dva), "protiv" 11, "suzdržalo" se šest. U drugom krugu glasanja, iz RS-a "protiv" je glasalo 11.
- Amandman Sadika Ahmetovića na član 18. (koji se odnosi na Srebrenicu): "za" glasala 24 (Federacija BiH 22, RS dva), "protiv" 10, "suzdržalo" se sedam poslanika. U drugom krugu glasanja, iz RS-a "protiv" je glasalo 10.
- Amandman Sadika Ahmetovića na isti član, a odnosi se na općinske biračke spiskove: "za" 23 (Federacija BiH 21, RS dva), "protiv" 11, "suzdržalo" se sedam. U drugom krugu glasanja, iz RS-a "protiv" je glasalo 11.
- Amandman Jerka Ivankovića Lijanovića: "za" 37 (Federacija BiH 24, RS 13), "protiv" jedan, "suzdržan" jedan.
- Amandman Kluba SNSD-a – "za" devet, "protiv" 20, "suzdržalo" se osam poslanika.

Poslije glasanja o amandmanima, provedeno je glasanje o Prijedlogu zakona u drugom čitanju.

"Za" Prijedlog zakona o izmjenama i dopunama Izbornog zakona BiH glasala su 23 poslanika (Federacija BiH 21, RS dva), "protiv" 16, "suzdržala" su se tri poslanika. U drugom krugu glasanja, iz RS-a "protiv" je glasalo 11 poslanika.

Predsjedavajući je konstatirao da nije usvojen Prijedlog zakona o izmjenama i dopunama Izbornog zakona BiH.

Ad.10. Prijedlog zakona o kretanju i boravku stranaca i azilu (drugo čitanje)

Predsjedavajući Živković dao je kratke uvodne napomene.

Nije bilo rasprave o Prijedlogu ovog zakona.

Zakon je usvojen sa 36 glasova "za" (Federacija BiH 24, RS 12), četiri poslanika bila su "suzdržana".

Ad.11. Prijedlog zakona o izmjenama i dopunama Zakona o Službi za poslove sa strancima (drugo čitanje)

Poslije kraćih uvodnih napomena predsjedavajućeg, kratko je govorio Bakir Izetbegović. Skrenuo je pažnju na jednu formulaciju koja se ne može popraviti popravkom ovog zakona, već popravljanjem nekih drugih zakona koji daju diskreciono pravo direktoru OSA-e da procijeni ko je opasnost po sigurnost države i da na bazi toga odstranjuje ljude iz BiH. Podsjetio je i na reakciju Helsinškog komiteta za ljudska prava u BiH koji je primijetio da se o sudbinama ljudi odlučuje bez njihove mogućnosti da se brane, rekao je Izetbegović.

Prijedlog zakona usvojen je sa 36 glasova "za" (Federacija BiH 23, RS 13) i četiri "suzdržana".

Ad. 12. Prijedlog kodeksa ponašanja poslanika i delegata u Parlamentarnoj skupštini BiH (drugo čitanje)

Poslije uvodnih napomena predsjedavajućeg, o Prijedlogu kodeksa vođena je duža rasprava u kojoj su učestvovali: Jerko Ivanković Lijanović, Husein Nanić, Vinko Zorić, Denis Bećirović, Šefik Džaferović, Mirko Okolić, Sadik Ahmetović, Sadik Bahtić, Selim Bešliagić i Momčilo Novaković.

Mirko Okolić predložio je da se Prijedlog kodeksa vrati Komisiji kao predlažaču, uz mogućnost ulaganja novih amandmana.

Raspravom o ovoj tački završen je prvi dan rada – u 17,45 sati. Nastavak sjednice zakazan je za sutra u 10 sati.

Prilikom glasanja (10. aprila 2008.) predsjedavajući je podsjetio na zaključak s prvog dijela sjednice, pa je obavijestio Dom da je nadležna komisija dostavila Kolegiju zahtjev za produženje roka, odnosno da se odgodi izjašnjavanje o Kodeksu dok se ne usvoji Zakon o izmjenama i dopunama Zakona o sukobu interesa u institucijama vlasti BiH.

Sa 41 glasom "za" (jednoglasno), Dom je usvojio ovaj prijedlog Komisije.

Predsjedavajući je rekao da misli da se ovaj posao može završiti do kraja aprila.

Trećeg aprila sjednica je počela u 10 sati. Prisustvovali su svi poslanici.

Prije prelaska na 13. tačku dnevnog reda, predsjedavajući Živković pozvao je učesnike u raspravi o Prijedlogu kodeksa da do četvrtka, 10. aprila 2008., kada će biti nastavljena 26. sjednica, dostavljaju amandmane po novim aspektima, a da će nadležna komisija dobiti zaduženje da održi sjednicu i da razmotri nove amandmane. U tom kontekstu pozvao je i Mirka Okolića da povuče svoj zaključak jer nije u skladu s Poslovníkom.

Mirko Okolić povukao je prijedlog zaključka, rekavši da i stav Kolegija daje mogućnost ulaganja novih amandmana.

Ad.13. Prijedlog zakona o izmjenama i dopunama Zakona o sukobu interesa u institucijama vlasti BiH – predlagači: poslanici Milorad Živković, Niko Lozančić i Šefik Džaferović (prvo čitanje)

Predsjedavajući Živković dao je kratke uvodne napomene, a Šefik Džaferović govorio je u ime Interresorne radne grupe, skrećući pažnju na inicijative koje je Grupa predložila domovima na usvajanje.

U raspravi su učestvovali: Jerko Ivanković Lijanović, Šefik Džaferović, Beriz Belkić, Niko Lozančić, Milorad Živković, Momčilo Novaković, Selim Bešliagić, Sefer Halilović, Adem Huskić i Mirko Okolić. Nakon rasprave, u ime Centralne izborne komisije BiH, govorio je Suad Arnautović.

Dom je, sa 32 glasa "za" (Federacija BiH 20, RS 12) i osam "suzdržanih", usvojio Prijedlog zakona iz ove tačke u prvom čitanju.

Inicijative koje je predložila Interresorna radna grupa usvojene su sa 28 glasova "za" (Federacija BiH 18, RS 10) i osam "suzdržanih".

Ad. 14. Prijedlog zakona o lijekovima i medicinskim sredstvima (prvo čitanje)

Poslije uobičajenih uvodnih napomena predsjedavajućeg, ministar civilnih poslova BiH Sredoje Nović podnio je Domu obrazloženje Prijedloga zakona.

U raspravi su učestvovali: Azra Alajbegović, Rifat Dolić, Ekrem Ajanović, Mirjana Malić, Lazar Prodanović, Halid Genac i Momčilo Novaković. Poslije rasprave, na pitanja je odgovorio ministar Nović.

Prijedlog zakona o lijekovima i medicinskim sredstvima usvojen je u prvom čitanju sa 37 glasova "za" (Federacija BiH 24, RS 13) i četiri "suzdržana".

Ad. 15. Prijedlog zakona o plaćama i naknadama u institucijama Bosne i Hercegovine (prvo čitanje)

Ministar finansija i trezora BiH Dragan Vrankić je, poslije kratkih uvodnih napomena predsjedavajućeg, podnio Domu obrazloženje Prijedloga zakona. Sadik Bahtić govorio je u ime nadležne Komisije za finansije i budžet.

U raspravi su učestvovali: Beriz Belkić, Rifat Dolić, Niko Lozančić, Milorad Živković, Slavko Jovičić, Bakir Izetbegović, Velimir Jukić, Jozo Križanović, Šefik Džaferović, Drago Kalabić, Milica Marković, Jerko Ivanković Lijanović, Ekrem Ajanović, Azra Alajbegović, Zlatko Lagumdžija, Sadik Bahtić, Vinko Zorić i Denis Bećirović.

Denis Bećirović iznio je poslovničku intervenciju rekavši da je predsjedavajući Doma prekršio član 71. i 73. jer nije upozorio poslanika koji je odstupio od dnevnog reda.

Predsjedavajući je rekao da će na glasanje dati pitanje – da li je predsjedavajući prekršio Poslovník.

Poslije polemike između predsjedavajućeg i Bećirovića u vezi s ovom situacijom, Šefik Džaferović javio se za riječ i rekao da misli da nema potrebe da se na glasanje daje pitanje o povredi

Poslovnika i da predsjedavajući ima ovlaštenje da vodi sjednicu i da procijeni kada je Poslovnik povrijeđen.

Predsjedavajući je rekao da prihvata Džaferovićevu sugestiju i da je razumije, ali da želi da se Dom izjasni o povredi Poslovnika. Zatim je proveo glasanje.

Dom nije potvrdio konstataciju Bećirovića da je predsjedavajući povrijedio Poslovnik. "Za" nije glasao nijedan poslanik, a "protiv" je glasalo 29 poslanika.

Poslije ovog glasanja, još su diskutirali: Beriz Belkić, Zlatko Lagumdžija, Milorad Živković, Adem Huskić, Niko Lozančić, Remzija Kadrić, Vinko Zorić, Sefer Halilović, Salko Sokolović, Denis Bećirović, Azra Hadžiahmetović i Jerko Ivanković Lijanović. Nakon rasprave, govorio je ministar Dragan Vrankić.

Prilikom glasanja, predsjedavajući je prvo na glasanje dao prijedlog zaključka Zlatka Lagumdžije, koji glasi:

„Povodom Prijedloga zakona o plaćama i naknadama zaposlenih u institucijama BiH, Predstavnički dom donosi odluku/zaključak da se rasprava i aktivnosti na usvajanju Zakona o dužnostima i prvima članova Parlamentarne skupštine BiH neće voditi dok Bosna i Hercegovina ne dobije status kandidata za članstvo u Evropskoj uniji, ili dok se ne donese novi Ustav BiH“.

Prijedlog ovog zaključka nije usvojen. "Za" je glasalo osam, "protiv" 31, "suzdržana" su bila tri poslanika.

Dalje je provedeno glasanje o prijedlogu zaključka Jerka Ivankovića Lijanovića, koji glasi:

„Zadužuje se Komisija za finansije i budžet da izradi formulu kojom će se vezivati plaće članova Parlamentarne skupštine BiH za ostvarene rezultate u oblasti vanjskotrgovinskog deficita. Naprimjer:

- svako smanjenje deficita za 1% - povećanje plaće poslanika/delegata od 10% do maksimalno 200% i
- za svako povećanje deficita za 1% - smanjenje plaće poslanika/delegata za 5% do maksimalno 90%.

Nije usvojen prijedlog zaključka. "Za" su glasala tri, "protiv" 32, "suzdržalo" se pet poslanika.

Zatim se Dom izjasnio o Prijedlogu zakona u prvom čitanju. "Za" je glasalo 30 (Federacija BiH 21, RS devet), "protiv" sedam, "suzdržao" se jedan poslanik.

Poslije glasanja o Prijedlogu zakona, Dom se izjasnio o prijedlogu zaključaka Kluba SDA koji glase:

„1. Zadužuje se Komisija za finansije i budžet i Ministarstvo finansija i trezora BiH da izvrše detaljnu analizu predloženih platnih razreda i koeficijenata u čl. 8., 9., 10., 12., 13., 14., 16. i 17. i, imajući u vidu socijalno stanje u bh. društvu, predlože nove koeficijente koji će odražavati realniji i pravičniji odnos visine plaća u institucijama BiH.

2. Zadužuje se Komisija za finansije i budžet da se u amandmanskoj fazi iz Zakona o plaćama i naknadama zaposlenih u institucijama BiH izuzmu plaće i naknade sudija, tužilaca i određenih kategorija stručnog osoblja u pravosudnim institucijama koje treba urediti posebnim zakonom“.

Nije usvojen ni ovaj zaključak. "Za" je glasalo 16 (Federacija BiH 14, RS dva), "protiv" 14, "suzdržalo" se 11 poslanika. U drugom krugu iz Republike Srpske "protiv" je glasalo 11 poslanika, što je više od dvije trećine iz entiteta.

Ad .16. Prijedlog zakona o izmjenama i dopunama Zakona o jedinstvenom matičnom broju (prvo čitanje)

Ad. 17. Prijedlog zakona o izmjenama i dopunama Zakona o ličnoj karti državljana Bosne i Hercegovine (prvo čitanje) i

Ad. 18. Prijedlog zakona o izmjenama i dopunama Zakona o prebivalištu i boravištu državljana Bosne i Hercegovine (prvo čitanje)

Nije bilo rasprave u okviru ovih tačaka dnevnog reda.

Prijedlozi zakona iz ovih tačaka usvojeni su u prvom čitanju, sa sljedećim rezultatima glasanja:

- tačka 16: "za" 36 (Federacija BiH 23, RS 14), "suzdržana" tri poslanika,
- tačka 17: "za" 36 (Federacija BiH 22, RS 14), "suzdržana" četiri poslanika i
- tačka 18: "za" 36 (Federacija BiH 22, RS 14), "suzdržano" pet poslanika.

Ad. 19. Prijedlog zakona o Fiskalnom vijeću BiH (prvo čitanje)

U uvodnim napomenama predsjedavajući je podsjetio na Mišljenje nadležne komisije o principima i na prijedlog zaključka koji Komisija u Mišljenju predlaže.

U raspravi su učestvovali: Momčilo Novaković, Azra Hadžiahmetović, Jozo Križanović, Savo Erić i Husein Nanić. Zatim je govorio ministar Dragan Vrankić.

Prijedlog zakona usvojen je u prvom čitanju sa 31 glasom "za" (Federacija BiH 20, RS 11), tri "protiv" i šest "suzdržanih".

Sa 32 glasa "za" (Federacija BiH 21, RS 11), tri "protiv" i šest "suzdržanih", Dom je, na prijedlog nadležne komisije, usvojio sljedeći zaključak:

Predstavnički dom Parlamentarne skupštine BiH zahtijeva od Vijeća ministara BiH da do okončanja amandmanske faze o Prijedlogu zakona o Fiskalnom vijeću BiH razjasni pitanje preklapanja nadležnosti između Fiskalnog vijeća BiH i Uprave za indirektno oporezivanje BiH (član 5. Prijedloga zakona), koji se dijelom odnosi na makroekonomsku projekciju i projekciju ukupnih indirektnih poreza i njihove raspodjele za narednu fiskalnu godinu.

Ad. 20. Prijedlog zakona o Agenciji za kontrolu i osiguranje prisilnog oduzimanja imovine stečene krivičnim djelima i upravljanje oduzetom imovinom, predlagači: poslanici Kluba SDPBiH (prvo čitanje)

Jozo Križanović je, u ime predlagača, podnio obrazloženje Prijedloga zakona.

U raspravi su učestvovali: Beriz Belkić, Bakir Izetbegović, Momčilo Novaković, Denis Bećirović, Niko Lozančić, Husein Nanić, Drago Kalabić, Azra Alajbegović, Šefik Džaferović, Zlatko Lagumdžija, Remzija Kadrić, Slavko Jovičić, Jozo Križanović i Velimir Jukić.

U okviru ove tačke Dom se prvo izjasnio o prijedlogu zaključka Kluba SDA koji glasi:

„1. Zadužuje se Vijeće ministara BiH da analizira usklađenost rješenja predloženih u predmetnom zakonu s krivičnim zakonima BiH i entiteta, te s rješenjima i mehanizmima kojima se ova problematika tretira u zemljama Evropske unije.

2. Tek nakon upoznavanja Predstavničkog doma o rezultatima analize iz navedenog zaključka, Dom će pristupiti glasanju o podršci Zakonu u prvom čitanju“.

Zaključak nije usvojen. "Za" su glasala 22 (Federacija BiH 20, RS dva), "protiv" 10, "suzdržalo" se 10 poslanika. U drugom krugu glasanja iz RS-a "protiv" je glasalo 11 poslanika.

Nakon glasanja o ovom prijedlogu zaključka, Dom se izjasnio o Prijedlogu zakona u prvom čitanju. "Za" je glasalo 10, "protiv" 23, "suzdržalo" se sedam poslanika. Prema tome, Dom nije usvojio Prijedlog zakona iz ove tačke u prvom čitanju.

Ad. 21. Prijedlog okvirnog zakona o srednjem stručnom obrazovanju i obuci (prvo čitanje)

Poslije kraćih uvodnih napomena predsjedavajućeg, Vinko Zorić pitao je ko je iz hrvatskog naroda učestvovao u pripremi Prijedloga zakona iz ove tačke, te da će on i njegov kolega iz HDZ-90 zatražiti produženje amandmanske faze na 30 dana kako bi mogli konsultirati niže nivoe, jer su uvidjeli da nisu u pripremi predloženog zakona učestvovali svi nivoi nadležni za obrazovanje.

Ministar Sredoje Nović odgovorio je na pitanja Vinka Zorića.

U raspravi su učestvovali Martin Raguž i Slavko Matić.

Prilikom glasanja Vinko Zorić odustao je od svog prijedloga.

Prijedlog zakona u prvom čitanju usvojen je sa 26 glasova "za" (Federacija BiH 16, RS 10), četiri "protiv" i 12 "suzdržanih".

Ad. 22. Izvještaj Zajedničke komisije o nastojanju za postizanje sporazuma o Prijedlogu zakona o izmjenama i dopunama Zakona o putnim ispravama BiH

U uvodnim napomenama predsjedavajući je konstatirao da je Zajednička komisija usaglasila istovjetan tekst Zakona o izmjenama i dopunama Zakona o putnim ispravama usvajanjem dva amandmana

Nije bilo rasprave.

Izvještaj Zajedničke komisije usvojen je sa 31 glasom "za" (Federacija BiH 21, RS 10) i osam "suzdržanih".

Nakon završetka prethodne tačke, predsjedavajući je pozvao predsjedavajuće klubova poslanika na dogovor o daljnjem toku sjednice.

Nakon dogovora predsjedavajući je obavijestio da se Prošireni kolegij dogovorio da se 26. sjednica prekine, a da će se nastavak održati 10. aprila 2008. Ovaj prijedlog dao je na glasanje.

Sa 30 glasova "za", tri "protiv" i četiri "suzdržana", usvojen je prijedlog da se sjednica prekine.

Zaključujući prvi dio sjednice, predsjedavajući je pozvao poslanike da amandmane na Prijedlog kodeksa dostave do srijede, 9. aprila 2008., a Zajedničku komisiju za ljudska prava pozvao da povodom novih amandmana održi sjednicu u srijedu, u popodnevnim satima, i Domu podnese izvještaj.

Sjednica je prekinuta u 18,35 sati.

Sjednica je nastavljena 10. aprila 2008. godine, s početkom u 10,05 sati. Prisustvovali su svi poslanici.

Iz Vijeća ministara BiH prisustvovali su: predsjedavajući Nikola Špirić, ministri Tarik Sadović, Selmo Cikotić, Safet Halilović, Sven Alkalaj, Slobodan Puhalac, Bariša Čolak i Božo Ljubić, te zamjenici ministara Fuad Kasumović, Senad Šepić i Mijo Krešić.

Iz međunarodnih organizacija prisustvovali su predstavnici: OHR-a, OSCE-a, Evropske komisije, EUPM-a, EUSR-a, britanske, američke i rumunske ambasade.

Sjednici su prisustvovali predstavnici Visokog sudskog i tužilačkog vijeća BiH, Tužilaštva BiH, Pravobranilaštva BiH, te Udruženja poljoprivrednika u Bosni i Hercegovini.

Sjednica je nastavljena na 23. tački.

Ad .23. Informacija o stanju sigurnosti u BiH za 2007. godinu, s Informacijom o trenutnom stanju sigurnosti u BiH (po zaključku Doma sa 21. sjednice) – dopunjena tačka

Ministar sigurnosti BiH Tarik Sadović podnio je Domu opširno uvodno izlaganje o ovoj tački dnevnog reda.

U raspravi su učestvovali: Slavko Jovičić, Martin Raguž, Milica Marković, Sadik Ahmetović, Snježana Rajilić, Sadik Bahtić, Selim Bešlagić, Mirko Okolić, Jozo Križanović, Denis Bećirović, Vinko Zorić, Salko Sokolović, Niko Lozančić, Momčilo Novaković, Adem Huskić, Šefik Džaferović, Sefer Halilović, Savo Erić, Husein Nanić, Zlatko Lagumdžija, Beriz Belkić, Mirjana Malić, Drago Kalabić, Remzija Kadrić, Hadži Jovan Mitrović, Jerko Ivanković Lijanović, Bakir Izetbegović, Sead Jamakosmanović, Velimir Jukić i Branko Dokić. Poslije rasprave, govorio je ministar Tarik Sadović.

Prijedloge zaključaka povodom ove tačke predložili su: Martin Raguž, Sadik Bahtić, Mirko Okolić, Snježana Rajilić, Jozo Križanović, Šefik Džaferović, Savo Erić, Jerko Ivanković Lijanović, Velimir Jukić i Drago Kalabić.

Prilikom glasanja predsjedavajući Živković obavijestio je Dom da Kolegij Doma, s obzirom na veliki broj predloženih zaključaka, predlaže da Dom Informaciju iz ove tačke primi k znanju i da zaduži nadležnu Zajedničku komisiju za odbranu i sigurnost da sve predložene zaključke, predate u pisanoj formi, razmotri (ima prijedloga zaključaka koji se i preklapaju) i da Domu predloži cjelovit

prijedlog zaključaka koji bi bili razmatrani i usvojeni. Ovaj prijedlog Kolegija je usvojen. "Za" je glasalo 36 poslanika (Federacija BiH 24, RS 12), "protiv" tri, jedan poslanik bio je "suzdržan".

Ad. 24. Informacija o radu Tužilaštva BiH za 2007. godinu

U raspravi o Informaciji o radu Tužilaštva BiH učestvovali su: Denis Bećirović, Momčilo Novaković, Mirko Okolić, Rifat Dolić, Šefik Džaferović, Sefer Halilović, Jozo Križanović, Sadik Bahtić, Martin Raguž, Šemsudin Mehmedović, Husein Nanić, Slavko Jovičić, Sadik Ahmetović i Zlatko Lagumdžija. U ime Tužilaštva BiH govorila je zamjenica tužioca Jadranka Lokmić-Misirača.

Zaključke povodom ove tačke podnijeli su Momčilo Novaković i Jozo Križanović.

Prilikom glasanja, predsjedavajući je rekao da Kolegij ima isti prijedlog kao u prethodnoj tački: da se Informacija o radu Tužilaštva BiH za 2007. godinu primi k znanju, a da nadležna komisija razmotri predložene zaključke i Domu podnese prijedlog na usvajanje. "Za" prijedlog Kolegija glasao je 31 poslanik (Federacija BiH 21, RS 10), "protiv" pet, "suzdržana" su bila tri poslanika.

Ad. 25. Izvještaj o radu Pravobranilaštva BiH za period od 1.1.2007. do 31.12.2007.

Šefik Džaferović govorio je u svojstvu predsjedavajućeg Ustavnopravne komisije. Rekao je da je prijedlog Komisije da Dom podrži ovaj izvještaj, ali da se javio da skrene pažnju da su 25. aprila 2006. godine dva zamjenika pravobranioca BiH imenovana na druge dužnosti i da ova institucija već dvije godine nema zamjenika. Naglasio je da misli da je krajnje vrijeme da se Pravobranilaštvo BiH popuni i da Dom zaključkom zatraži od Vijeća ministara BiH da u roku od 60 dana imenuje zamjenika pravobranioca.

U raspravi je učestvovao Sefer Halilović.

Izvještaj Pravobranilaštva BiH nije usvojen. "Za" je glasalo 13, "protiv" 19, "suzdržalo" se osam poslanika.

Ad. 26. Razmatranje Programa mjera za primjenu Sporazuma CEFTA

U uvodnim napomenama predsjedavajući Živković podsjetio je na zaključke koje je Domu predložila nadležna komisija u Mišljenju o Programu mjera.

U raspravi u okviru ove tačke učestvovali su: Rifat Dolić, Šemsudin Mehmedović, Jerko Ivanković Lijanović, Momčilo Novaković, Velimir Jukić, Selim Bešliagić, Zlatko Lagumdžija i Azra Hadžiahmetović.

U ime resornog ministarstva govorio je ministar Slobodan Puhalc, a nakon toga predsjedavajući Vijeća ministara BiH Nikola Špirić.

Povodom Programa mjera, zaključke u pisanoj formi predložili su Šemsudin Mehmedović i Zlatko Lagumdžija.

Prilikom glasanja Dom se prvo izjasnio o zaključcima predloženim u raspravi.

Prijedlog zaključka Mehmedovića nije usvojen. "Za" su glasala 22 (Federacija BiH 20, RS dva), "protiv" 11, "suzdržalo" se sedam poslanika. U drugom krugu glasanja, iz RS-a "protiv" je glasalo 11 poslanika. Predložen je sljedeći zaključak:

„1. Osloboditi dizel za poljoprivredu od carina (plavi dizel).

2. Osposobiti i akreditirati laboratorije potrebne za kontrolu kvaliteta hrane, odnosno provesti donesene pravilnike iz ove oblasti, te za certifikaciju prehrambenih proizvoda potencijalnih bh. izvoznika.

3. Osposobiti hitno Ured za veterinarstvo, Agenciju za obilježavanje životinja, kao i ostale institucije koje se bave ovom problematikom.

4. Donijeti akcioni plan (okvirni) s ciljem zaštite od bruceloze.

5. Donijeti državni zakon o organskoj proizvodnji.

6. Sačiniti program (s entitetima) za korištenje nezasijanih površina (oranica).

Nije usvojen ni prijedlog zaključka Zlatka Lagumdžije. "Za" je glasalo 28 (Federacija BiH 26, RS dva), "protiv" 10, "suzdržala" su se četiri poslanika. U drugom krugu glasanja, iz RS-a "protiv" je glasalo 11. Sadržaj zaključka je sljedeći:

„Zadužuje se Vijeće ministara BiH da, u skladu s obavezama proizašlim iz Odluke Vijeća ministara Evropske unije br. 2008/211/EC, od 8.2.2008., pristupi zakonskom reguliranju i formiranju ministarstva poljoprivrede, hrane i ruralnog razvoja, te proslijedi Parlamentarnoj skupštini BiH potrebne dokumente na usvajanje.“

Nakon glasanja o prijedlozima zaključaka poslanika, Dom je, sa 29 glasova "za" (Federacija BiH 19, RS 10), jednim "protiv" i devet "suzdržanih", usvojio Program mjera za primjenu Sporazuma CEFTA, sa zaključcima koje je predložila nadležna komisija, a koji glase:

1. Obavezuje se Ministarstvo vanjske trgovine i ekonomskih odnosa BiH da dopuni Akcioni plan stavkom: **„primjenjivati član 23. bis Sporazuma CEFTA na prijedlog poljoprivrednih proizvođača i/ili udruženja poljoprivrednih proizvođača zbog ozbiljnih poremećaja na domaćem tržištu, nastalih kao rezultat prekomjernog uvoza“.**

2. Ministarstvo vanjske trgovine i ekonomskih odnosa BiH ažurirat će rokove predložene u Akcionom planu te obavijestiti Dom o realizaciji mjera za koje su istekli predloženi rokovi.

3. Vijeće ministara BiH uložiti će napore za osposobljavanje i opremanje državnih institucija neophodnih za nesmetan izvoz bh. proizvoda.

4. Neophodno je angažirati nadležne institucije za stalno pružanje pomoći i dodatnu obuku bh. proizvođača kako bi jednostavnije izvozili svoje proizvode i na taj način imali ravnopravan status sa izvoznici iz zemalja potpisnica CEFTA-e. Isto tako, neophodno je preduzimanje odgovarajućih mjera kojim bi se osposobili bosanskohercegovački proizvođači da budu konkurentni na bh. tržištu i na tržištu zemalja potpisnica CEFTA-e.

Ad. 27. Davanje saglasnosti za ratifikaciju:

- c) "eSEE" Agenda plus za razvoj informacionog društva u Jugoistočnoj Evropi – SEE 2007. – 2011.
- d) Sporazuma između država članica Sjevernoatlantskog ugovora i ostalih država koje učestvuju u Partnerstvu za mir o pravnom položaju njihovih snaga, Dodatnog protokola Sporazumu između država članica Sjevernoatlantskog ugovora i ostalih država koje učestvuju u Partnerstvu za mir o pravnom položaju njihovih snaga i Daljnog dodatnog protokola Sporazumu između država članica Sjevernoatlantskog ugovora i ostalih država koje učestvuju u Partnerstvu za mir o pravnom položaju njihovih snaga.

Predsjedavajući je podsjetio da je nadležna komisija dala pozitivno mišljenje o ovim sporazumima. Nije bilo rasprave.

Dom je dao saglasnost za ratifikaciju akata iz ove tačke, sa sljedećim rezultatima glasanja:

- pod a): "za" 37, "suzdržana" tri poslanika;
- pod b): "za" 34, "suzdržano" pet poslanika.

Sjednica je završena u 20,35 sati.

Sastavni dio Zapisnika je transkript 25. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Milorad Živković